

Namibia sedia sambut Abdullah

UM - 20/4/2007

WINDHOEK 19 April - Namibia memberi penghormatan kepada Datuk Seri Abdullah Badawi yang dijadual tiba untuk lawatan ke negara ini pada Khamis dengan menghias gambarnya dan bendera Malaysia bersebelahan gambar Presiden Namibia Hifikepunye Pohamba dan bendera negaranya di sekitar bandar ini.

Perdana Menteri yang dalam kunjungan akhirnya ke tiga negara Afrika selama lapan hari, dijadual tiba di Lapangan terbang Antarabangsa Hosea Kutako pada kira-kira pukul 6.30 petang (1.30 pagi waktu Malaysia). Beliau sebelum ini melawat Sudan dan Kenya.

Gambar Abdullah dan bendera Malaysia turut digantung dari lapangan terbang kira-kira 45km dari Windhoek hingga ke pusat bandar. Hosea Kutako adalah pejuang negara ini yang menentang penjajahan Jerman pada 1880.

Ketibaan Abdullah dijadual disambut oleh Presiden Namibia dan Menteri Perdagangan dan Industri, Immanuel Ngatjizeko, yang menjadi menteri pengiring.

Namibia yang menempatkan Namib, padang pasir tertua di dunia, mempunyai penduduk berjumlah kira-kira dua juta.

Windhoek pula yang bermaksud Lembah Berangin mempunyai penduduk seramai 200,000 orang.

Antara lain Perdana Menteri dijangka menyampaikan ucaptama pada Forum Perniagaan Malaysia-Namibia esok dan menerima kunjungan hormat Speaker Dewan Undangan Namibia Dr. Theo-Ben Gurirab dan presiden pengasas Dr. Sam Nujoma.

Abdullah dijangka berlepas pulang ke Kuala Lumpur pada Sabtu.

- **Bernamea**